

Bwzswz Guh Hozdung “Bouxcoz Gangj” Henzguek Hungzcwngz

百色举行红城边关“青年说”活动

“Baezbaez benz mbaeklae daengz gaiq gyaiqbaiz 588 hauh, yawjraen mbaw vujsingh hungzgiz mbinyagyag、cihsaw gwnz gyaiqbaiz hoengzfwgfwg, ndawhoz gou gag raen miznaj dangqmaz!” Mboengqneix, Gvangjsih Haeujok Henzguek Genjcaz Cungjan Bwzswz Henzguek Gvanlij Cihdui, Lungzbanh、Bingzmung Haeujok Henzguek Genjcazcan caeuq Bwzswz Siveij doxgap guh hozdung “bouxcoz gangj” henzguck hungzcwngz. Yienhciengz miz gangj goj bouxcoz、eufwen、ndaek gujcwnggh daengj. Hozdung neix gikleih bouxcoz ciepcienz gihiyinh saekhoengz, ciengx-lwenx buekguh baenaj, gaenxmaenx hen ndei henzguck, saedyienh Cunghvuz Minzcuz fukhwng hungmbwk.

(Vuz Cauhnwngz/吴超能 Youz Veih/游辉 Vangz Bungzyij/王鹏宇)



▲ Cawjboq caeuq bouxgagnyienh cigboq bang bouxgunnaz gai huq.

Gagnyienh Fugsah Mbanj-yauz Raeuj Sim Vunz 瑶乡志愿服务暖民心

Cigboq gai huq、daeq gyaeuj mbouj aeu ngaenz、bang vunzlai mbaet mak……Gaenh geij bi neix, Ginhsiu Yauzcuz Swciyen mboujduenh gyagiengz doengh aen doih gagnyienh fugsah、hanghmoeg, doidoengh lajmbanj hwnghoengh hwnghat. Ginhsiu cujcz bouxgagnyienh guh “hoih lauxdungz Yauzcuz cuengq sing doeg”、aeu Vahyauzcuz lwnghangj daengj hanghmoeg. Daengx yienh gungh miz songbak itcib caet aen doih gagnyienh fugsah, doxcaez doidoengh ginghei gwnzbiengz hwnghat, gaijgez hojnanz vunzlai.

(Gauh Yuzginh/高如金 Moz Yijcangz/莫宇嫦)

Gvangjsih Minzhez Bae Yungzsuij Diuyenz Ingj Siengq 广西民协到融水开展摄制调研活动

8 nyied 24 daengz 25 hauh, Aen Vwnzyigyah Hezvei Gwnzbiengz Gvangjsih daengz Yungzsuij Myauzcuz Swciyen ingj siengq diuyenz “govuengz Gvangjsih caeuq couqmaenh gij eijsik caezcaemh Cunghvaz Minzcuz”. Aen Vwnzlenz Yungzsuij yaek haivat vwnzyi cienzdoengj fwen、go ndawyienh, aeu fwen lwnghangj cwngcwz leih minz、cinghseuq ranz ndei、minzcuz doxgiet daengj, aeu fwen gap baengzyoux cix ndaej bang gyoengq beixnuengx gak minzcuz sam gyau, coenghregz saenq-hwng lajmbanj. (Siz Gveiz/石奎)



▲ Gyoengqvunz cingq caijfangj govuengz Yauzcuz.



▲ “Ranz guhlaux ngveihsigloux” youq Mbanj-siusuij biengj baiz.

Fuconh Fazyen Laebbaenz “Ranz Guhlaux Ngveihsigloux” 富川法院成立“石榴籽调解室”

Mboengqneix, Fuconh Yauzcuz Swciyen Yinzminz Fazyen youq Mbanj-fuzhih、Mbanjsiusuij biengj baiz laebbaenz “ranz guhlaux ngveihsigloux”. Neix ndaej cug di cauhguh aen diji “ngveihsigloux” guh hong guhlaux, coenghregz hwnqguh aen mbanj (segi) huzndei mbouj doxceng doxnauh haenx, henhoh minzcuz doxgiet, baujcan gij gienzik habfap gak cuz lwgminz. Neix caemh ndaej hawj vunzlai caezhoz guhlaux, byaijok diuz roen minzcuz doxgiet moq ndeu. (Cangh Gveizsingh/张奎星)